

# LOS ESTUDIOS DE LAS COMUNIDADES LOCALES EN UN MARCO GLOBALIZADO

*Margarita Fernández Mier*

ORCID iD: 0000-0002-0303-0294

*Luis Miguel Flecha Rebollar*

ORCID iD: 0000-0003-3943-9697

**Resumen:** Frente a algunos discursos historiográficos tradicionales del medievalismo, centrados en personajes míticos legitimadores de los estados nación, que se están recuperando últimamente a pesar de su caducidad, aparecieron en las últimas décadas líneas de investigación que generan discursos alternativos que, a partir de la reivindicación de la cultura local estudiada desde los orígenes históricos medievales, reclaman otra forma de gestión del territorio para las comunidades locales. En este sentido, el nuevo grupo de investigación llevó adelante diversos proyectos de investigación referentes a los marcos teóricos más actuales, además de experiencias de transferencia de conocimiento.

**Palabras clave:** medievalismo, toponimia, comunidades locales, campesinado, transferencia de conocimiento.

## *STUDIES OF LOCAL COMMUNITIES IN A GLOBAL FRAMEWORK*

**Abstract:** *In the face of the re-emergence —despite their obsolescence— of some traditional medievalist historiographical discourses focused on mythological elements that legitimise nation states, certain lines of research developed in recent decades can be oriented as alternative scientific narratives that, from the vindication of local culture studied from medieval or other historical roots, reclaim political power for the communities of said territories. In this regard, our research group has carried out various research projects that consider the most current trends, as well as sharing the research results in experiences of knowledge transfer with these current communities.*

**Key words:** *medievalism, toponymics, local communities, peasantry, knowledge transfer*

## I. INTRODUCCIÓN

La política actual y las consecuencias de la crisis sanitaria, que tuvo una afección universal, tán redefiniendo la xeoestratexa mundial, lo que xenera un momentu de cambéu qu'obliga a repensar qué papel han tener les humanidaes na nuesa sociedá, sobre manera na historia. Apremia activar nuevas vías d'investigación histórica y nuevas narratives nuna sociedá na que la teunoloxía se fai omnipresente y na que se xeneren discursos puramente mercantilistes que vacien de valor la producción científica que surde de les humanidaes por considerar que nun tienen una aplicación práctica darréu y pola imposibilidad de medir económicamente la xeneración de conocimientu humanísticu.

Si miramos pal últimu quartu del sieglu XX, nun podemos negar les grandes consecuencias que tuvo la globalización, favorecida polos vertixinosos cambeos teunolóxicos que, acompañaos d'una fuerte tresformación social, uniformaron les nuseses pautes de consumu, estilos de vida y modes, que s'homoxeneizaron en tolos puntos del planeta. Una globalización que favorez la desterritorialización en política que s'exemplificó na crisis del estáu nación surdió de les polítiques lliberales del sieglu XIX —que buscaba la so llexitimación nel pasáu medieval— yá afaló procesos d'articulación d'entidaes polítiques de calter tresnacional más favoratibles a la integración territorial y que nos dexen superar esa fragmentación política, siendo la Xunión Europea l'exemplu con más éxitu, a pesar de tolos sos problemes y contradicciones.

Per otru llau, paralelamente, asistimos tamién a movimientos de calter llocal, más apegaos al territoriu, que reacionen en contra la globalización, pero tamién frente a la falta de respuestes afayadices per parte de los estaos nacionales y qu'aspiren a redefinir la so rellación colos modelos de gobiernu vixentes, metiéndose peles fiendes de la crisis d'estes entidaes polítiques, procesu que dalgunos llamaron llugarización (González Cruz, 2004) o neo-tribalismo (Ordóñez Chacón, 2002). Asina, los estaos nacionales vense énte una doble problemática de redefinición de nuevos escenarios, tanto a nivel global como llocal.

## 2. LA GLOBALIZACIÓN Y LA HISTORIA DE LOS ESTAOS NACIONALES

Nes últimes décadas del sieglu XX y la primer década del sieglu XXI, el discursu sobre la crisis de los estaos nacionales fíxose omnipresente, favoreció, principalmente, por unos factores económicos que puxaben pola articulación de nueves formes de gobiernu de calter tresnacional, menos intervencionistes, que favorecieren el fluxu llibre de bienes, capital y persones y que permitieren que los mercaos globales crearen una economía más integrada y eficiente, d'acordies, evidentemente, colos planteamientos del neoliberalismu.

Dambos procesos tuvieron el so reflexu na historiografía. Asina, per un llau, l'amplia bibliografía sobre los oríxenes del estáu modernu va lligada a esa idea de llexitimación de los estaos nacionales europeos (Hunt, 2022) y, per otru, la busca na dómina carolinxa de les raíces d'una Europa xunida y el financiamientu de proyeutos d'investigación pola Xunión Europea (Fernández Mier *et al.*, 2021) traten de fundamentar la nueva realidá política que se foi construyendo nel vieyu continente. Son dos bonos exemplos de les llinies de trabayu de les que s'ocupó'l medievalismu européu inspiráu poles entidaes polítiques que protagonicen la historia del sieglu XX y que sirvieron pa llexitimaes: dende la más temprana historiografía de fines del sieglu XIX, que reforzó, y en dellos casos creó, la identidá de los estaos nación, hasta, más recién, nel últimu quartu del sieglu XX, les narratives que favorecen la forxa d'una identidá europea qu'enconta les instituciones que configuraron la Xunión Europea.

Per otru llau, y arraigonaos nos paradigmes históricos que fueron dominantes nel sieglu anterior, asistimos na segunda metá del sieglu XX a l'activación de modelos qu'intenten desplicar el procesu de la globalización de forma conxunta y poliédrica, que, si bien focalicen l'atención na formación del capitalismu, retrotraen les sos raíces al mundu medieval apurriendo visiones de calter más global, siendo pa superar los marcos de la investigación de los estaos nación, pero tamién de les nueves estructures polítiques de la Xunión Europea. Probablemente'l modelu más interesante nesi sen ye'l del sistema-mundu de Wallerstein (2004), que define los modelos de centru y periferia y que, de dalguna manera, retoma les idees de Braudel (1992) sobre

la historia total. Too esto ensin escaecer otres aproximaciones que tenten de superar eses visiones más eurocentristes y que dan mayor centralidá al continente asiáticu (Frank, 2008), o propuestas qu'inciden na necesidá d'avanzar nuna historia global del periodu medieval, que centre'l so interés en redes tresculturales que nos permitan tener una visión más amplia y complexa del periodu comprendíu ente l'año 500 y el 1500 con una visión que vaya más allá de les llendes del Mediterraneu (Borgolte, 2017). Toes elles propuestas que reflexonen paralelamente a los procesos de globalización.

La crítica a los estaos nación, por consideralos un frenu a la xeneración de nueves formes de gobiernu tresnacionales, tuvo una importante repercusión nuna parte de los estudios sobre'l medievu, yá que la crisis de la entidá política traxo, en cuantes a les grandes narratives sobre l'orixe de los estaos, un ciertu sentimientu de perda del horizonte de la investigación per parte de los especialistas. A ello axuntóse la crítica articulada dende'l denomáu *New Medievalism*, qu'incidió en discutir cómo los trabayos sobre la Edá Media tuvieron mediatizaos por intereses ideolóxicos, políticos, nacionales o personales, enfatizando que les nueves llinies d'investigación tienen que s'esmolecer por otres temátiques que tresciendan les clásiques aproximaciones polítiques del historicismu, económicques del materialismu históricu o identitaries de los movimientos sociales de los coeutivos escluyíos del últimu quartu del sieglu XX (Brownlee *et al.*, 1991).

Yá nel sieglu actual, nun tenemos que perder de vista que tanto la crisis financiera del 2008 como la sanitaria de 2020 y la militar de 2022 supunxeron cierta reafirmación de los estaos nacionales, que fueron los encargaos, primero de xestionar les midíes pa iguar la grave crisis económica del 2008, más de recién la última crisis sanitaria mundial, y anguaño afronten la crisis d'abastecimientu enerxéticu que xenera la guerra d'Ucráina. Esto fai que dellos autores planteguen que, lloñe de tar nel llechu de muerte, los estaos nacionales tienen de convertise nos elementos clave d'una economía mundial pluralista, na que los estaos nación conserven una autonomía que-yos faiga posible desendolcar estratexes polítiques que s'afayen a les sos necesidaes (Rodrik, 2017).

Paralelamente, asistióse a otru fenómenu nesta última década que reflexa una reaición frente a esos procesos de globalización y de perda de

les identidaes nacionales: la reactivación de discursos soberanistes, d'ultra-derecha, amparaos nos gloriosos pasaos nacionales, que, nel casu d'España, caltienen un discursu imperialista españolista que proclama la soberanía española frente a la globalización. Asina, vuelven los güeyos a una historia medieval de mitos y grandes personaxes, qu'una bona parte del medievalismu creía superada, pero que se presenta con aires anovaos de la mano de grupos políticos que ponen n'evidencia que l'ideariu ideolóxicu del franquismu nun taba escaecíu, pelo menos per una parte importante de la población, y que, amás, sigue firmemente arraigonáu nel imaxinariu coleutivu sobre los oríxenes de la nación española. Reactívase asina una historia medieval acientífica a la que se recurre p'afirmar un pasáu gloriosu nel que se busquen héroes y modelos de conducta que xustifiquen determinaes polítiques xenófobes y d'exaltación de los valores nacionales y católicos, que s'espande rápidamente peles redes sociales ensin interés nengún en sofítase n'estudios científicos (Elliot, 2017).

Nesti contestu, la reflexón sobre'l papel del medievalismu y la so implicación cola sociedá actual tien d'incidir en perpasar una actitú acrítica y poco implicada socialmente, que valore los llabores de divulgación y permita recuperar aquellos llugares de los que fuimos reemplazaos pola presencia de discursos acientíficos. La hiperespecialización na investigación, cierta teunificación y una fuerte competencia por xenerar una actividá investigadora d'altu impautu, acordies con una mirada neolliberal de la ciencia que ruerpe los sos raigaños col territoriu y cola sociedá, allóñennos de la propuesta d'implicación social que taba presente nos trabayos de Mar Bloch (2015), que quiciabes taviéremos de relleer y recuperar, especialmente de cara a los conocimientos y valores que queremos tresmitir a los nuevos alumnos.

### 3. PROCESOS DE LLOCALIZACIÓN

Nestes páxines iniciales apuntemos curtiamente los procesos que tán rellacionaos cola globalización y los estaos nacionales, pero nun hemos pasar per alto, como yá indiquemos na introducción, el cuestionamientu de les polítiques estatales per parte de movimientos de calter llocal que reivindicquen nueves soberaníes y territorialidaes y esixen formes nueves

de relacionase col Estáu. En gran medida, estas reacciones activóles la influencia que tien la globalización nos espacios llocales, que faen posible la llegada de nueves teunoloxíes, un mayor accesu a la formación y a los servicios, favoreciendo l'activación de reivindicaciones de nueves maneres de gobiernu, en dellos casos de calter autoxestionáu, que van algamando diverses formes en tola xeografía del planeta.

Nel casu d'España tienen el so reflexu en distintes espresiones: dende los nacionalismos históricos, que comparten conceición política colos estaos nación —que tamién xeneraron una historiografía propia de llexitimación histórica—, hasta movimientos de calter estremáu definíos por elementos que xeneren patrones comunes d'identidá. Una d'estes esperiencias son les reivindicaciones lligaes a territorios rurales que sufren unos procesos de despoblación severos, que ven cómo se desarticulen les sos formes tradicionales de producción empobinándose a diverses alternatives económiques lligaes a propuestas ecolóxico-productivistes o d'industrialismu agrariu que busquen la rentabilidá del campu y que, sicasí, pueden tener un eleváu costu medioambiental y ruempen colos sistemes tradicionales de producción que se basaben na sostenibilidá. Reivindíquense asina modelos de xestión más implicaos na política territorial llocal —redefiniendo la so rellación coles instituciones estatales— y que se sofiten nos valores tradicionales y los saberes etnoecolóxicos de les poblaciones llocales.

Son estos últimos movimientos los que nos interesa resaltar nesti trabayu pola rellación que tienen coles comunidaes llocales y con delles de les propuestas d'investigación que, arraigonaes nel territoriu, no llocal y no rural, fueron bien dinámiques na última década dientro del medievalismu. Asina, desendolcáronse propuestas d'investigación anclaes nel territoriu con una fuerte implicación cola sociedá, desenvolviendo diversos modelos de tresferencia de conocimientu con raigañu na historia rural realizada nes últimes décadas del sieglu XX (Fernández Mier, 2018a, 2018b).

#### 4. LES COMUNIDAES LLOCALES: ESTUDIU Y ACTIVACIÓN SOCIAL

La primer espresión identitaria de los individuos tien que ver cola comunidá na que nacen y el territoriu asociáu a esa comunidá, que ye'l que permite'l

so sustentu. Al rodiu d'esi territoriu anuédense determinaes rellaciones sociales, créense normes que xestionen les dependencias, privilexos y obligaciones y, sobre él, compónse una cosmovisión compartida por tola comunidá que fai posible que se sientan partes d'un tou, favoreciendo la revitalización de los particularismos, de lo qu'identifica a esa comunidá: dende lo económico a lo político o cultural. Esta rellación primaria col territoriu nun ye única, la pertenencia de los individuos a una comunidá supón la implicación en distintes entidaes de calter suprallocal nes que s'integren, xenerando asina ideas identitaries múltiples, que namás han de ser entendibles si baxamos na escala d'análisis. Por ello, son necesarios averamientos multiescalares llocales que permitan entender les singularidaes de los individuos dientro d'esos entidaes y de los territorios dientro de los estaos y de la globalidá, fomentando l'entendimientu del diálogu ente los distintos niveles.

Nel marcu de l'actual Xunión Europea, ún de los principales retos ye plantegar l'actual problema de la integración de la inmigración que contribuyó a un drásticu cambéu de les comunidaes llocales, mesmo les urbanes que les rurales. De fechu, bona parte de les llinies d'investigación de los proyeutos europeos oriéntense precisamente a esti retu social que supunxo volver la vista a les formes de gobiernu del espaciu llocal, entrugándose sobre los sos conflictos, tensiones, xerarquizaciones y sobre'l so pasáu pa dar respuesta a los nuevos retos que se planteguen a nivel llocal pa diseñar ferramientes participatives y que favorezan la convivencia.

Ensin dulda, la problemática de la rellación de les comunidaes col territoriu y la so conceutualización ye abondo distinta nel mediu urbanu, onde podemos dicir que se ta produciendo un procesu de desterritorialización al ser cada vegada más pequeñu l'espaciu nel que se desendolca l'actividá —barrios o urbanizaciones— a pesar de la medra de tamañu de les ciudaes. Sicasí, nel espaciu rural, los códigos d'usu y propiedá entren davezu en contradicción cola conceición que tien l'estáu de la xestión del territoriu, y, por supuestu, tamién coles nueves entidaes polítiques que se xeneren a nivel supranacional qu'han de llexislar sobre comunidaes llocales bien diverses y con un ampliu espectru de problemátiques, d'ehí l'interés creciente nel estudiu de les comunidaes llocales, magar la complexidá que s'escuende tres d'esti conceutu.

Too ello supunxo activar llinies d'investigación sobre les comunidaes llocales, qu'insisten na comprensión de los particularismos, pero tamién nos elementos en común, apostando en munchos casos pola reactivación de l'alministración llocal y plantegando de forma complexa cómo s'han xestionar los bienes que son de la coleutividá, especialmente tres de la influyente obra d'Östrom (1990) sobre la xestión de los comunales.

Nesti contestu, non menos relevante ye'l creciente interés sobre la sostenibilidá de la xestión de los recursos y el fondu cambéu ambiental, climáticu y global que tamos viendo anguaño y que yá naide pue negar. La mirada sobre cómo se consiguen y s'aprovechen los recursos camudó drásticamente nes últimes décadas, empezando a dar valor a unes práu-tiques de xestión de los recursos que va pocos años yeren consideraes reflexu d'una sociedá atrasada y que na actualidá empiecen a ser revalorizaes como una posible respuesta a la problemática medioambiental. Nesta revalorización inxértense dafechu la conocencia etnobiolóxica y etnohistórica que les comunidaes llocales tienen sobre'l territoriu y qu'han de ser el puntu de partida pa la redefinición de nueves formes de xestión de los recursos.

Probablemente, una de les llinies de trabayu más actives nesta dinámica seya la del metabolismu social que, dende disciplines mui amplies como la economía ecolóxica o la ecoloxía política, pon l'acentu n'entender les llendes biofísiques y l'alteración nos ciclos bioxeoquímicos. Los cambeos nes formes d'apropiación de los recursos, el consumu y les demandes escomanaes, tienen que s'analizar pa proponer distintes formes de xestión. Nesi sen, ye obligao conocer les formes d'aprovechamientu del pasáu pa tener una visión más complexa del presente y definir una metodoloxía de trabayu interdisciplinar de calter socioecolóxicu que faiga posible entender les rellaciones ente la sociedá y la naturaleza, que tenga en cuenta distintes escales d'análisis y que s'avere al so estudiu de forma diacrónica (Toledo, 2013).

D'esta miente, distintes problemátiques actuales, mesmo sociales qu'ecolóxiques o polítiques, punxeron nel centru d'atención les comunidaes llocales rurales, lo que supunxo la reactivación del so estudiu nel marcu del medievalismu y de l'arqueoloxía medieval. Asina, trabayos

desendolcaos principalmente por dellos grupos d'investigación, ente los que ta'l que pertenez a l'autora d'esti trabayu<sup>1</sup>, volvieron la vista al estudiu de les comunidaes llocales como mediu pa dar respuesta a determinaes problemátiques actuales rellacionaes col despoblamiento, la minusvalorización del mediu rural, la degradación ecolóxica de delles fasteres, les propuestas de renaturalización defendíes dende delles instancies alministratives que xeneralmente van arreyaes a la invisibilización del papel del llabrador y de les comunidaes llocales na xestión del territoriu y, poro, del papel que tuvieron na historia.

Nesti nuevu marcu social y políticu que se ta xestando, presidíu pola crisis socioambiental qu'afeuta al planeta, l'estudiu de les comunidaes llocales dende una perspeutiva poliédrica y multidisciplinar ha ser una ferramienta básica que faiga posible xenerar nueves narratives históriques a los grupos sociales o comunidaes que se vieron arrequexaos poles grandes narratives venceyaes a los estaos nación, qu'anubrieron el papel desempeñáu poles comunidaes llocales rurales, lo que tien el so meyor reflexu en bona parte de la historiografía lligada al medievalismu desendolcada nel sieglu pasáu.

##### 5. LA HISTORIA RURAL Y L'ARQUEOLOXÍA AGRARIA COMO FERRAMIENTES PA XENERAR NUEVES NARRATIVES HISTÓRIQUES

Vamos centrar l'atención en definir los caminos siguiós pol nuesu grupu d'investigación<sup>2</sup> pa entamar una metodoloxía de trabayu que denomamos Arqueoloxía Agraria (Alonso González *et al.*, 2018; Fernandez Mier *et al.*, 2023) implementada en zones del Cordal Cantábricu (España), pero tamién con iniciatives n'otros ámbitos xeográficos, escéntricos al conceutu del *medievalismu*<sup>3</sup>. Camentamos que pue ser un exemplu d'investigación histórica, atenta a la incorporación de nuevos marcos teóricos y metodolóxicos y

---

<sup>1</sup> Grupu d'investigación LLABOR <https://arqueologiaagraria.wordpress.com/>

<sup>2</sup> <https://arqueologiaagraria.wordpress.com/>

<sup>3</sup> De recién, de mano de Patricia Aparicio (2020), el grupu d'investigación llevó alantre una investigación nos Andes peruanos emplegando l'Arqueoloxía Agraria pa facer estudios sobre los paisaxes agrarios d'época prehispánica.

a nuevos interrogantes históricos, que dexa afondar n'aspectos desatendíos n'investigaciones pasaes, dando protagonismu a los grupos sistemáticamente invisibilizaos, como los llabradores.

Al empar, tien capacidá pa xenerar nueves narratives sobre los procesos históricos de los territorios, convirtiéndose nuna ferramienta activa que facilite l'análisis d'esos llugares de forma complexa y na llarga duración. Permite afondar nes formes d'apropiación del territoriu, na so conceutualización per parte de les comunidaes y nes actividaes agrícolas/ganaderes desendolcaes camudando'l paisaxe, dando llugar a un agroecosistema que busca soluciones a les llendes qu'imponen les condiciones xeográfiques. Ye posible entender los mecanismos ensayaos pa esta adautación —formes de cultivu y xestión del agua, sistemas d'aterrazamientu, práutiques ganaderes treshumantes complementaries— que definen actividaes agraries presidies pola busca d'una racionalidá de los usos de los nichos ecolóxicos, xenerando sistemas productivos sostenibles —si aceutamos l'aplicación del términu a épocas pasaes—. Información de calter medioambiental qu'ha de ser una ferramienta inevitable na toma de determinos sobre la xestión de los territorios rurales d'anguaño. A ello ha d'amestase una práutica histórica que s'implique coles poblaciones llocales, activando propuestas de sociabilización científica y de tresferencia de conocimientu que suponga que les comunidaes estudiaes participen de la xeneración d'esti, avanzando escontra actuaciones de ciencia ciudadana tan demandada últimamente nes convocatories d'investigación y que, en munchos casos, resuélvense con actividaes que tresformen al actor social nun axente pasivu. Consideramos que ye necesario entamar actividaes qu'apuesten pola co-construcción de conocencia que dea protagonismu a les sociedaes que son oxetu de la nuesa investigación.

Esta propuesta d'Arqueoloxía Agraria arraigona na historia rural de la segunda metá del sieglu pasáu qu'activó estremaes llinies d'investigación qu'afondaron nos mecanismos de dominación de la xente llabrador medieal. L'interés pola realidá de los llabradores convirtió les comunidaes aldeanes n'oxetu d'investigación privilexiáu, focalizando l'interés nos procesos de feudalización y tratando de carauterizar estes comunidaes nos siglos altomedievales. L'análisis de les comunidaes fíxose nel marcu d'estudios

territoriales qu'anteponíen l'averamientu a los señoríos nel mundu rural y fixeron posible l'aproximamientu a la xente llabriegu nun contestu social complexu estudiando los movimientos sociales qu'enfrentaron a llabradores con señores. Estes llinies d'investigación punxeron l'acentu nos aspectos sociales, poniendo menor atención a los económicos, por cuenta de la dificultá d'analizar unes fontes escasas que nun permiten la cuantificación, daqué que perxudicó la interllocución ente historia y arqueoloxía énte l'ausencia d'entruques cruzaes. Ye un anovamientu historiográficu mui influyíu pola potente historia rural francesa que s'afitave dende la década de los años trenta, n'especial cola obra de Marc Bloch (1931) y qu'impauta fuertemente n'España nes décadas de los setenta y ochenta.

Esto favoreció'l desendolcu d'investigaciones nos años noventa del sieglu XX qu'enfocaron la so atención al territoriu y al paisaxe que se describe nos documentos, entrugándose sobre les aportaciones que l'arqueoloxía podría facer al estudiu d'estos procesos, con especial atención a la conformación de les redes de poblamientu, que se convirtieron dende esi momentu nuna temática preferente d'investigación dende les fontes escrites, averándose a la información arqueolóxica qu'ufiertaben los estudios de prospeición de superficie (Fernández Mier, 2018a). Pasu ente pasu, distintes iniciativas reclamaron la necesidá d'analizar el territoriu, los llabradores y los aspectos rellacionaos cola producción agropecuaria y el ciclu agrícola dende'l rexistru material, sobre manera nel marcu de l'arqueoloxía andalusí y, con más retrasu, nel de l'arqueoloxía de les sociedaes feudales. Estos grupos de trabayu van dir afondando en distintes metodoloxíes d'acercamientu al mundu rural (arqueoloxía del territoriu, etnoarqueoloxía, toponimia, arqueoloxía de los despoblaos, llectura regresiva del paisaxe) dando dalgunes d'elles nel afitamientu de llinies d'arqueoloxía agraria (Kirchner, 2010), por cuenta de les reflexones que se faen sobre l'arqueoloxía del paisaxe, un conceutu qu'a lo llargo de les últimes décadas algamó mayor protagonismu, marcu nel qu'hemos d'entender el desendolcu de l'arqueoloxía agraria.

L'arqueoloxía del paisaxe ye una propuesta metodolóxica pa la investigación de les sociedaes antigües dende la so espacialidá. Nun se trata d'una simple

ampliación del rexistru, d'un simple cambéu d'escala xeográfica; trátase d'una conceición de la historia na que les rellaciones sociales —colos sos componentes visibles ya invisibles— adquirieren el protagonismu y na que la exa ye'l cambéu social (Orejas y Ruiz del Árbol, 2013, pp. 201-202).

D'esti mou, de la mano de les reflexones que se dan en toa Europa, amodo, va dir imponiéndose la visión del paisaxe como l'espaci u nel que se sinteticen les rellaciones sociales, económicas, polítiques ya ideolóxicas de les comunidaes, un paisaxe en continuu tresformamientu, dinámicu, que coneuta'l pasáu col presente, yá que caltién elementos mui diversos de distinta cronoloxía que se redefinen a lo llargo de la historia, que son resilientes y que conformen el paisaxe actual.

Esta interpretación del paisaxe esixía la definición de ferramientes de trabayu afayadices pa descodificar estos significaos en tola so dimensión. La complexidá del paisaxe abrió camín a distintes corrientes y metodoloxías que fueron focalizando'l so interés en dalgún componente concretu del paisaxe nel marcu de cierta influyencia de la nueva arqueoloxía y l'arqueoloxía posprocesual. Asina, van delliniándose les metodoloxías de trabayu, amestándose métodos procedentes de les ciencias sociales y humanes (xeografía, historia, llingüística) y de les ciencias ambientales (arqueobioloxía y arqueoxeoloxía). Sicasí, a pesar de la vocación de síntesis que teníen les distintes propuestas que se fueron implementando, les obres científiques focalizaron la investigación en distintos componentes del paisaxe, baxo'l prisma de diverses metodoloxías y dividiendo la investigación en periodos históricos, estayando la complexidá del paisaxe y fomentando la fragmentación de la investigación qu'en poques ocasiones respondía a la planificación de proyeutos globales d'análisis del paisaxe.

Nesti marcu teóricu, el nuesu grupu d'investigación da los primeros pasos pa la comprensión de los agroecosistemas del norte de la península ibérica, diseñando un protocolu d'actuación que toma como marcu d'investigación la unidá básica del poblamientu, l'aldea, pero non yá'l llugar d'hábitat, sinón tol territoriu asociáu a ella, aplicando estudios de calter microterritorial en dos exemplos con problemátiques distintes: un llugar de mediu monte, Vigaña (Miranda), y otru asitiáu no fondero d'un valle,

Villanueva (Santu Adrianu), dambos exemplos n'Asturies. Son asentamientos d'orixe medieval y que tuvieron ocupación hasta güei, lo qu'esixía reflexonar sobre la metodoloxía de trabayu qu'hai qu'aplicar en llugares tovía habitaos (Fernández Fernández y Fernández Mier, 2019).

El primer pasu foi l'análisis de los parcelarios de la mano de los estudios morfolóxicos influyíos pola arqueoxeografía francesa, intentando la reconstrucción periodizada de les formes del paisaxe y la conocencia de les dinámiques de llarga duración qu'esplican les pervivencies d'estes formes antigües (Chouquer y Wateaux, 2013). A partir del análisis de tola cartografía histórica y de les formes actuales del parcelariu, tomando la fotografía aérea como base, los estudios morfolóxicos permitieron analizar la forma, orientación y métrica de les parceles y la rellación qu'hai ente elles. Asina, identificáronse estructures del parcelariu que se venceyen colos asentamientos arqueolóxicos y colos llugares actuales, estableciendo cronoloxíes relatives, definiendo elementos que se podíen adscribir a distintos periodos históricos y plantegando hipótesis sobre les continuidaes y rotures nel usu y tresmisión d'estes formes.

Na realización d'estos estudios morfolóxicos dase especial importancia al análisis de la toponimia. Nun primer momentu por ser conscientes de la so durabilidad dende época medieval hasta l'actualidá, lo que permitía dar cronoloxía histórica a delles formes del parcelariu (Fernández Mier, 2006). Nun segundu momentu, afondando na idea de que'l sistema toponímicu d'un llugar fai posible averase a la perceición que tienen los sos habitantes del territoriu al que dan nomes en función de cómo lo perciben; ye una construcción social, los topónimos son el frutu d'un consensu, o del conflictu, definen el territoriu, son d'utilidá pa la comunidá y, poro, tienen de ser aceutaos y entendíos por toos. La toponimia menor permite acceder a la mentalidá de los llabradores: en función de la so etimoloxía pue ufiertar información de calter económicu, social, relixosu, de creyencies, en resume, diznos cómo piensa la xente'l territoriu. Né'l espéyase la densa conocencia ecolóxica llocal, al empar que facilita la xestión diaria del territoriu per parte de los miembros de la comunidá (Jones, 2016).

A partir de la conocencia completa qu'aportaben los estudios morfolóxicos, plániense les intervenciones arqueolóxicas, lo qu'implica dende

l'análisis de les unidaes doméstiques y los llugares d'hábitat per onde circulen, s'almacenen y se consumen los productos, hasta l'estudiu de les zones de producción, centrándose nun primer momentu nes eres, sistemas de riego y espacios aterrzaos y ampliando'l so estudiu a les zones de pastu y monte xeneralmente acomuñaes a práutiques d'usu coleutivu. Esto supón escavar elementos del espaciu agrariu col enfotu d'entender cómo se constrúin les terrazas, los procesos estratigráficos de les lloses, la progresiva deforestación, la creación d'espacios de pastu, les construcciones ganaderes asociaes a los distintos tipos de treshumania. Tolo que permita una meyor caracterización de les práutiques económicas llabriegues, introduciendo tanto los análisis bioarqueolóxicos como los micromorfolóxicos de suelos, lo que favoreció la densificación de la descripción y comprensión de les formes de producir como actividaes agrícolas o ganaderes, práutiques d'abonáu, evolución del paisaxe vexetal o tipu de sema. Esto supunxo escavar los pequeños güertos nel interior de les árees d'allugamientu, la tierra de llabor averada a los pueblos que formen parte de les estructures agraries con formes de xestión coleutiva, los sistemas d'aterrazamientu y tamién los espacios destinaos a pastu en zones d'usu comunal y estructures ganaderes en zones de monte.

Asina, foi definiéndose un protocolu d'actuación que ta tovía lloñe de la homoxeneidá, pero que ta dexándonos algamar una información cualitativa sobre la formación estratigráfica de los paisaxes, especialmente nel noroeste peninsular, y que permite abrir un discutiniu sobre les metodoloxíes amañoses p'acometer la investigación y llograr dataciones absolutes d'estes estructures.

La investigación plantea l'estudiu de la territorialidá de l'aldea, pero tamién los espacios de xestión coleutiva, xeneralmente zones d'usu ganaderu y forestal, pero tamién agrícola. D'esta miente, la investigación incorpórase al discutiniu sobre la xestión de los comunales, englobándose baxo esta denominación una amplia diversidá de recursos aprovechaos de forma coleutiva y semicoleutiva, qu'a lo llargo de los siglos fueron la base de la dinámica socioeconómica y reproductiva de les comunidaes llocales nel marcu d'una economía orgánica (Ortega Santos, 2001; González de Molina y Ortega Santos, 2000). Nestos terrenos nun se pue establecer una

disociación ente lo privao y lo público, yá que la propiedá particular da accesu al aprovechamientu de los bienes coleutivos (Izquierdo Martín, 2007), amás de que se rixeron por instituciones internes de les comunidaes al rodiu de les que s'anueda una diversidá de rellaciones sociales.

El tema de los comunales convirtióse na actualidá nuna cuestión de relevancia política, invocada dende distintos movimientos ya instituciones (Calle, 2015). Los diversos averamientos a la cuestión del comunal dende la historia, la economía y l'antropoloxía xeneraron una variedá de ferramientes conceutuales y un ampliu volume d'información qu'ilustra la diversidá, complexidá y conflictividá de la so xestión acordies col so dinamismu a lo llargo de la historia. Ello esixe'l so estudiu dientro de la mesma realidá socioeconómica na que tán integraos, según l'análisis de la so resignificación por cuenta de los cambeos que se producen nel sistema socioeconómicu y les formes de propiedá y aprovechamientu.

Nesti marcu d'investigación, la nuesa aportación ye entrugase sobre cómo plantegar el so estudiu dende l'arqueoloxía, yá que'l rexistru material atiende a un ampliu númberu d'elementos que permiten afondar en cuestiones mui diverses (Stagno, 2017; Fernández Mier y López Gómez, 2021). Fueron los análisis arqueobiolóxicos los que posibilitaron un primer averamientu a los comunales, pero otros rexistros empiecen a dar respuesta a interrogantes que yá se plantegaron dende otres llinies d'averamientu. Por exemplu, son múltiples los elementos que faen posible entender les territorialidades de les comunidaes, xeneralmente trazaes al traviés de zones d'usu coleutivu, emplegando variedá de marcadores que se perpetúen nel paisaxe (finxos, marques) o reutilizando antiguos asentamientos como finxos del territoriu, dotándolos d'una carga simbólica ya histórica que s'incorpora a los valores identificativos de les comunidaes. Per otru llau, les intervenciones nes construcciones ganaderes ufierten una amplia cronoloxía que se retrotrái a la prehistoria recién y evidencien la reutilización de los mesmos espacios, facilitando asina la comprensión de les estratexes productibles nes zones d'usu comunal en distintos periodos históricos que tenemos d'interpretar dientro de los marcos socioeconómicos y políticos de cada momentu históricu. La metodoloxía arqueolóxica aplicada a les estructures agraries (terracees agraries, tierres semaes, sistemes de riego, zarramientos) permite

tamién afondar na cronoloxía del diseñu de les unidaes agrícolas, mesmo les atopaes nos espacios comunales asitiaos nes llendes del territoriu aprovecháu por una comunidá que les cercanes a los llugares d'hábitat y d'usu semicoleutivu (Smith, 2000; Fernández Fernández, 2017). Asina, atrópase información de calidá sobre la cronoloxía de la conformanza d'estos llugares de sema sobre los que se tien aldericao enforma, especialmente na bibliografía anglosaxona (Willianson, 2012, Ripon, 2008; Ripon *et al.*, 2015; Carvajal Castro, 2017).

Toos estos elementos faen que seyamos pa entender les lóxicos internes d'apropiación y aprovechamientu d'importantes recursos per parte de les comunidaes llocales, pero tamién son un escenariu óptimu p'afondar nel papel que desempeñen como espacios de concurrencia de distintes lóxicos políticos, económicos y sociales de calter suprallocal. Esti tipu d'allugamientos, que tienen la so meyor espresión nos sitios d'aconceyamientu o xuntanza alcontraos na converxencia de distintes comunidaes xerarquizaes, ye reflexu de la diversidá d'elementos de calter económicu, social ya identitariu que s'anueden al rodiu d'estos llugares centrales. El so estudiu, al traviés del rexistru arqueolóxicu, tien de contribuir nel futuru con información relevante pa entendelos na so complexidá, apurriendo cronoloxíes que nos ilustren sobre la variedá de procesos que son opacos o se reflexen de forma marxinal nes fontes escrites.

Con estes, l'estudiu de los comunales dende la materialidá tien de dir acompañáu d'una relectura de les fontes documentales, facilitando asina la identificación de práutiques coleutives que nos permiten afondar na complexidá que presenta'l so aprovechamientu y xestión a lo llargo de la Edá Media, evidenciando la diversidá de les respuestes y la so rellación con estremaos marcos sociopolíticos (Martín Viso, 2020).

Estos estudios microterritoriales y multidisciplinarios permitieron llograr información densa a lo llargo del tiempu, permitiendo carauterizar, económica, social y culturalmente les comunidaes llocales analizaes, asina como entendedes dientro d'otros marcos d'actuación de calter suprallocal, seyan les parroquies, los conceyos o los señoríos que les incorporen a redes económicas de calter más o menos complexu. Obviamente, la información llograda da preferencia a los datos diacrónicos que dexaron

delliniar les formes d'aprovechamientu del paisaxe dende'l neolíticu hasta güei, definiendo momentos d'importantes cambeos culturales qu'ilustren cómo una comunidá tresformó'l paisaxe aprovechando les posibilidaes ecolóxicques pa producir, les midíes correutores implementaes pa evitar l'agotamientu de los recursos y la erosión, pero tamién cómo se conceitualiza'l territoriu al traviés de la reinterpretación simbólica de los xacimientos prehistóricos en momentos posteriores o cómo se-y da nome al territoriu en rellación cola so xestión. Una densa información que fai posible averanos al conocimientu etnoecolóxicu qu'atesoren les comunidaes llocales, que tien los sos códigos y formes de xestión qu'implementaron a lo llargo de milenios y que ye necesario revalorizar pa da-yos protagonismu na toma de determinos sobre les polítiques qu'hai qu'implementar na actualidá. Esto supunxo activar una propuesta de xestión patrimonial arraigonada na situación actual de les comunidaes estudiaes, onde nin la conocencia histórica científica nin la conocencia ecolóxica y cultural tradicional s'inxerten nes polítiques de xestión territorial. Esto implica esterrar la idea de la esclusividá del conocimientu arreyáu a l'autoridá académica, trespasando fronteres epistémiques y metodolóxicques al traviés d'un averamientu interdisciplinar qu'incorpore los saberes etnoecolóxicos y etnohistóricos llocales. L'éxitu de les polítiques de xestión del mediu rural pasa per incorporar marcos conceutuales que tengan en cuenta les dinámiques humanes que determinen les modalidaes d'aprovechamientu del territoriu, el manexu de recursos naturales y la conceutualización del espaciu per parte d'aquellos que lu aprovechen (Zalles, 2017).

Precisamente, de la que tábemos acabando de redautar estes llinies, resonaba l'ecu de les noticies de les terribles quemes del branu del 2022, qu'afararon bona parte de la península ibérica y que calcinaron estenses árees de la España despoblada. La escasa población llocal clama por midíes preventives y cada vegada son más les voces que reivindiquen l'usu de práutiques tradicionales como mediu de prevención. Esti tien de ser ún de los oxetivos que tenga l'Arqueoloxía Agraria: revalorizar esi conocimientu llocal atopáu al traviés de la esperiencia de milenios y xenerar narratives que dean protagonismu a estos actores llocales pa que sirva pa empoderalos con vistes a una recuperación activa de la xestión del territoriu llocal.

Esto llógrase principalmente al traviés de la formación. Por ello, la nuesa investigación complementáse cola activación de proyeutos de tresferencia de conocimientu nos que s'esperimentaron distintes iniciatives: per un llau entamar un llaboratoriu esperimental d'anovación social y patrimonial denomináu La Ponte-Ecomuséu, dotáu de la so propia personalidá xurídica (empresa social), basáu nel principiu de l'autoxestión comunitaria, nel que s'inxertaron tanto espertos como aficionaos, toos habitantes del llugar (Fernández Fernández *et al.*, 2017). N'otros casos focalicemos l'atención na población infantil y moza, favoreciendo la conocencia del mundu rural nel que tán integraos, afayando los valores patrimoniales del so entornu y fomentando la creación d'elementos identitarios qu'ayuden a compensar los poderosos referentes urbanos énte los rurales. Pa ello implicuémonos activamente coles escueles públiques de les zones estudiaes poniendo en marcha un proyeutu denomáu ConCiencia Histórica col que facemos partícipe a tola comunidá educativa de les nuses investigaciones, depren-diéndo-yos el métodu científicu al traviés de la inclusión del alumnáu na práutica arqueolóxica, al empar que se llogra una actitú positiva y activa en rellación cola custodia del patrimoni u cultural.

En definitiva, concebimos l'Arqueoloxía Agraria como una práutica científica que non solo da conocimientu científicu sobre les comunidaes llocales na Edá Media, sinón que tien de ser una ferramienta con potencial tresformador que favoreza la cultura científica nel alumnáu rural, que xeneralmente tien menos accesu a esti tipu d'iniciatives, y que faiga posible coneutar el pasáu col presente, revalorizando la conocencia etnobiolóxica y etnohistórica llocal, y xenerando discursos históricos que permitan dar visibilidá ya importancia a la población que foi protagonista na xestión del territoriu llocal (Alonso González *et al.*, 2018; Fernandez Mier *et al.*, 2023).

REFERENCIAS BIBLIOGRÁFIQUES

- ALONSO GONZÁLEZ, Pablo; FERNÁNDEZ MIER, Margarita & FERNÁNDEZ FERNÁNDEZ, Jesús, (2018): «La ambivalencia del paisaje. De la genealogía a la Arqueología Agraria», *Munibe*, 69, pp. 283-296.
- BLOCH, Marc (1931): *Les caractères originaux de l'histoire rurale française*. París, A. Colin.
- BLOCH, Marc (2015): *Apología para la historia o el oficio de historiador*. México, Fondo de Cultura Económica.
- BORGOLTE, Michael (2017): «A crisis of the Middle Ages? Deconstructing and Constructing European Identities in a Globalized World», en Graham A. Loud & Martial Staub (ed.), *The Making of Medieval History*. York, York Medieval Press, pp. 70-84.
- BRAUDEL, Fernand (1992): *Civilization and Capitalism, 15<sup>th</sup>-18<sup>th</sup> Century*, vol. 1, *The Structure of Everyday Life*. Berkeley, University of California Press.
- BROWNLEE, Marina S.; BROWNLEE, Kevin & NICHOLS, Stephen G. (eds.) (1991): *The New Medievalism*. Baltimore, The Johns Hopkins University Press.
- CALLE COLLADO, Ángel (2015): «La relevancia económica y política del enfoque de los bienes comunes», *Kult-Ur*, 2(3), pp. 55-76.
- CARVAJAL CASTRO, Álvaro (2017): «Prácticas colectivas y gestión de los espacios agrarios en la Alta Edad Media: una perspectiva comparada desde Irlanda y el noroeste de la Península Ibérica», *Historia Agraria*, 73, pp.151-183.
- CHOUQUER, Gerard & WATEAUX, Margali (2013): *L'archéologie des disciplines géohistoriques*. París, Errance.
- ELLIOT, Aandrew B.R. (2017): *Medievalism, Politics and Mass Media. Appropriating the Middle Ages in the Twenty-First Century*. Cambridge, Boydell & Brewer.
- FERNÁNDEZ FERNÁNDEZ, Jesús (2017): «Arqueología de una aldea medieval y su espacio agrario: Villanueva de Santo Adriano (Asturias, noroeste de la península Ibérica)», *Historia Agraria*, 72, pp. 79-107.
- FERNÁNDEZ FERNÁNDEZ, Jesús & FERNÁNDEZ MIER, Margarita (eds.) (2019): *The Archaeology of Medieval Villages Currently Inhabited in Europe*. Oxford, Archeopress.

- FERNÁNDEZ MIER, Margarita (2006): «La toponimia como fuente para la historia rural: la territorialidad de la aldea feudal», *Territorio, Sociedad y Poder*, 1, pp. 35-52.
- FERNÁNDEZ MIER, Margarita (2018): «De la Arqueología del Paisaje a la Arqueología Agraria», en Quirós Castillo, Juan Antonio (ed.), *30 años de arqueología medieval en España*. Oxford, Acces Archaeology - Archaeopress, pp. 225-270.
- FERNÁNDEZ MIER, Margarita (2018b): «El paisaje rural medieval: del estudio de los dominios monásticos a la Arqueología Agraria», en Soto Fernández, David & Lana Berasain, José Miguel (eds.), *Del Pasado al futuro como problema. La historia agraria Española en el siglo XXI*. Madrid, Sociedad Española de Historia Agraria, pp. 39-59.
- FERNÁNDEZ MIER, Margarita & LÓPEZ GÓMEZ, Pablo (2021): «Archaeology of the commons: Seasonal settlements in the Cantabrian mountains», en *Seasonal Settlement in the Medieval and Early Modern Countryside*. Leiden, Sidestone Press Academics.
- FERNÁNDEZ MIER, Margarita, FERNÁNDEZ FERNÁNDEZ, Jesús & LÓPEZ GÓMEZ, Pablo (2023): «Agrarian Archaeology: A Research and Social Transformation Tool», *Heritage*, 6, núm 1, pp. 300-318.
- FRANK, Andre G. (2008): *Re-orientar: la economía global en la era del predominio asiático*. Valencia, Publicacions de la Universitat de València.
- GONZÁLEZ CRUZ, Francisco (2004): «Lugarización, globalización y gestión local», *Documentación social*, 133, pp. 11-30.
- GONZÁLEZ MOLINA, Manuel & ORTEGA SANTOS, Antonio (2000): «Bienes comunes y conflictos por los recursos en las sociedades rurales, siglos XIX y XX», *Historia Social*, 38, pp. 95-116.
- HUNT, Lynd (2022): *La escritura de la Historia en la era global*. Valencia, Universidad de Valencia.
- IZQUIERDO MARTÍN, Jesús (2007): «En nombre de la comunidad. Antropología de la comunidad en el Antiguo Régimen», en Congost Colomer, R. & Lana Berasain, J.M., *Campos cerrados, debates abiertos. Análisis histórico y propiedad de la tierra en Europa (siglos XVI-XX)*. Pamplona, Universidad Pública de Navarra, pp. 53-74.

- JONES, Richard L.C. (2016): «Responding to Modern Flooding: Old English Place-Names as a Repository of Traditional Ecological Knowledge», *Journal of Ecological Anthropology*, 18 (1).
- KIRCHNER, Helena (ed.) (2010): *Por una arqueología agraria. Perspectivas de investigación sobre espacios de cultivo en las sociedades medievales hispánicas*. Oxford, Archaeopress.
- MARTÍN VISO, Iñaki (2020): «Territorios resilientes: mancomunales y concejos en el sur del Duero durante la Edad Media», *Vínculos de Historia*, 9, pp. 226-245.
- ORDÓÑEZ CHACÓN, Jaime (2002): *Neo-tribalismo y globalización*. San José de Costa Rica, Facultad Latinoamericana de Ciencias Sociales, FLACSO.
- ORTEGA SANTOS, Antonio (2001): «La desarticulación de la propiedad comunal en España, siglos XVIII-XX: una aproximación multicausal y socioambiental a la historia de los montes públicos», *Ayer*, 42, pp. 191-212.
- ÖSTROM, Elinor (1990): *Governing the Commons: The Evolution of Institutions for Collective Action*. Cambridge, Cambridge University Press.
- OREJAS, Almudena & RUIZ DEL ÁRBOL, María (2013): «Arqueología del Paisaje: procesos sociales y territorios», en Quirós Castillo, Juan Antonio (ed.), *La materialidad de la historia. La Arqueología de inicios del siglo XXI*. Madrid, Akal, pp. 201-240.
- RODRIG, Dany (2017): *Straight Talk on Trade*. New Jersey, Princeton University Press.
- RIPPON, Stephen (2008): *Beyond the Medieval Village: The Diversification of Landscape Character in Southern Britain. Medieval History and Archaeology*. Oxford, Oxford University Press.
- SMITH, Henry E. (2000): «Semicommon Property Rights and Scattering in the Open Fields», *The Journal of Legal Studies*, 29(1), pp. 131-169.
- STAGNO, Anna (2017): «Archeologia e storia di uno spazio precario. Le colture temporanee tra pratiche collettive e appropriazione privata (Paesi Baschi, XV-XX secolo)», *Quaderni Storici*, 2, pp. 499-536.
- TOLEDO, Víctor (2013): «El Metabolismo Social. Una nueva teoría socioecológica», *Relaciones*, 136, pp. 41-71.

WALLERSTEIN, Immanuel (2004): *World-System Analysis: An Introduction*. Durham, Duke University Press.

WILLIAMSON, Thomas, (2012): *Environment, Society and Landscape in Early Medieval England*. Woodbridge, The Boydell Press.

ZALLES, Jorge I. (2017): «Conocimiento ecológico local y conservación biológica: la ciencia postnormal como campo de interculturalidad», *Íconos. Revista de Ciencias Sociales*, 59, pp. 205-224.